

# INUIT ATAQATIGIIT

## INATSISARTUNI



UPA16/116  
14. april 2016  
Peter Olsen

### **Uunga siunnersuut: Kulturikkut ingerlatsineq sunngiffimmilu sammisassaqartitsineq pillugit Inatsisartut inatsisaat nr. xx, xx. xx 2016-imeersoq.**

(Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisoq)

Inatsisissatut siunnersuut qulaani pineqartumut matumuuna Inuit Ataqatigiinni imatut oqaaseqaateqassaavut.

Kulturilerineq anersaakkullu pikialaartitsineq ineriartortitsiuarnerlu inuaqatigiinni atugartuunngorusuttuni pinngitsoorneqarsinnaangilaq.

Oqartoqarajupporlu inuiaat sanngiitsut, inerisimanngitsut, piitsuusut, ineriartoqqinnisaminnullu nukissaqanngitsut tassaakkajupput inuiaat kulturilerinermik anersaarsionermillu pingaartitaqanngitsut, aalluttaqanngitsullu.

Kulturikkut anersaakkullu pikialaartitsisugut taassaapput, ulluinnarni inuunitsinni inuunitsinnik avataangiisitsinnillu isumaqalersitsillutillu, nuannersunngortitsisullutillu qalipaasersueqataasut, nipitalersuisuusut, isumaliulersitsisartut, nuannaalersitsisartut, aliasutsitsisartut, nikallornittalu nalaani nukissatsinnik tunioraajuartuusut. Kulturilerisugut anersaalerisugullu tassaapput ulluni nuannersuni nuanninngitsunilu peqatigiuartakkavut tasiortigiuartakkavullu.

Takorlooriarsiuk iternitsinninngaaniit innarnissatta tungaanut ulloq taamaat raadiumi, tv-mi, video-mi film-mi, katersortarfimmi, Katuami, pisiniarfinni sumiluunniit tamani nipilersorpalaanguamil-luunniit tusarsaasoqanngitsoq, festivaleqanngitsoq. Inuuneq qanoq nuanniik? Inuuneq qanoq imaqqanngik? Inuuneq qanoq pikkunaak?

Takorluulaariarsiuk taalliortoqqanngitsoq, erinniortoqqanngitsoq, timersortoqqanngitsoq, illup ilua assiliaqanngitsoq, qalipagartaqanngitsoq, kusanartuliaqanngitsoq, eqqummiitsuliaqanngitsoq, filmiortoqqanngitsoq, isiginnaagas saqqanngitsorluunniit; Inuuneq qanoq nuanniik, inuuneq qanoq imaqqanngik, inuuneq qanoq pikkunaak?

Aali tassa tamakku ulluinnarni eqqarsaatigineq ajukkagut, taamaattussaannartulli isigilersimasavut. Uffalu taama inuutsinni pingaaruteqartigisut, uffalu aamma inuunitsinni ulluinnarni pinngitsoorsinnaangitsigigut.

Taamaattumik naalakkersuinikkut suliaqartuusugut kulturilerisutsinnik anersaarsiortutsinnillu pingaartitsinissarput tapersersuinissarpullu pingaaruteqartupilorujussuuvog.

Taamaattumik tamannarpiag siunertaralugu siorna upernaakkut 2015-mi ataatsimiinnitsinni naalakkersuisut kulturimut tunngasumik inatsisi lioqqullugit peqquneqarnissaannik Inuit Ataqatigiit sinnerlugit siunnersuuteqarnikuuvunga, nuannaarutigeqisannillu inatsisartunit amerlanerussuteqartunit tamanna akuerineqarsimavoq.

Taamaattumik nuannaarpunga tulluusimaarlungalugu tassa ullumikkut kiisami ulloq manna qilanaarisimasara pissangagisimasaralu nalliummat, inatsisissatut siunnersuut naalakkersuisunit naammassineqarallarpoq saqqummiunneqarlunilu.

Naatsumik oqaatigalugu takorloorsimasakka siunnerfigisimasakkalu uniorpallaarnagit inatsisissaq suliarineqarsimasut oqaatigineqarsinnaavog; kulturilerisugut

anersaarsiortortartagullu siornatigu-mut naleqqiullugu sinaakkutinik ersarinnerusunik pitsaanerusunillu atugassaqaartinneqalerput.

Kisianni imaangilaq inatsissap uuma pilersinneqarneratigut suna tamarmi aaqqittoq uparua-gassartaaruttorlu. Sunaluunniit pitsaanerujuaannarsinnaasarpoq, soorlu aamma una suliaq taamatut oqaatigineqarsinnaasoq.

Taamaattoq tulluusimaarlunga oqarsinnaasoraanga, inatissassatut siunnersuut saqqummiunneqartoq tassaammat ajunnginnerusunik atugassaqalernissatsinnut alloriarneq siulleq.

Inatsisip immikuualuttortai tamaasa immikkut oqaaseqarfigissanngilakka, taamaattoq annikitsualunnguanik uparuagassartaqarmat uparuagassartai imaattut uparuaaffigilaarusuppakka:

1. § 7-mi kulturikkut illorsuaqarnermut aamma aningaasaleeqataasinnaanermut tunngasumik allaqqasoqartariaqarpoq.
2. § 10-mi isiginnaartitsinerup – teaterip sunngiffimmi sammisassaqaartitsinermi sammineqarsinnaanissaa ilanngunneqartariaqarpoq.
3. § 11-mi sunngiffimmi sammisassaqaartitsinermi atortorissaarutit atugassat peqataasup kisimi akilernagit kommunilu akileeqatigiinnikkut pisinnaasunngornissaa kissaatiginarpoq.
4. § 11-mi imm.7-mi peqataanissamut nalunaarsimasut ikinnerpaamik arfineq pingasuunatit sisamaannanngortinneqarnissaat kisaatigineqarpoq.
5. § 12-milu ikinnerpaamik sisamat ataappagit atuartitsinerup unitsinneqarsinnaaneranik ileqqoreqqusaq pingasut ataappagimut appartinneqarnissaa kissaatigarpoq.
6. § 16-mi oqalugiartoqarnera inuit ikinnerpaamik 15-unissaannik piumassaqaat appartinneqassasoq inunntut arfineq marlunntut.
7. Taamattuttuaarlu § 17-mi aqqaneq marluunatik, arfiniliinnanngortinneqarnissaat kissaatiginarluni.
8. § 19 piiginnaraanni assigiinnannginnerpaa? Sunngiffimmi atuartitsinermut nalunaartarneq akeqanngitsuusariaqarpoq, meeqqanuuppat, inersimasunuuppalluunniit.

Naggataatigut ilanngullugu apeqqutigerusunarpoq filminstitutsimik pilersitsinissaq sumiinnersoq, aammalu kulturikkut umiarsuarmik pilersitsisinnaanermut tunngasut sumiippammita? Eqqarsaatigineqarnerpat? Uani inatsisissami ilanngunneqarsimanngimmata takuneqarsinnaanatillu. Qanormita taakku pineqarniarpat?

Inuit Ataqatigiinniit naqissusissavarput filminstitut-issamik pilersitsiniarneq tapersensoratsigu, isumaqarpugullu piffissanngortoq filminstitut-ip pilersinneqarnissaa; film-iliortartugut ullumikkut amerlialuttuinnarput pikkorissigaluttuinnarlutillu, immikkullu sinaakkusiunneqarnissartik aqqutissiuunneqarnissartillu aamma ujartorpaat pisariaqartippaallu.

Taassuma saniatigut kulturikkut umiarsuarmik pilersitsinissaaneq Inuit Ataqatigiinniit aamma soqutiginartutut isigigatsigu oqaatigissavarput; inuiaasugut sineriasuarmi angeqisumi siassimalluta, pisariaqartipparput tamatta kulturikkut anersaarsiornikkullu sukkut tamatigut immersorneqarnissar-put qaammarsarneqarnissarpullu; timmisartukut angalaneq akisuallaarujussuarpoq, sineriasuatsinnilu inoqarfiit amerlanerpartaat kulturilerinikkut anersaarsiornikkullu suliaqarnermi anguneqarsinnaassappata taava pisariaqartinneqartoq tassaavoq umiarsuaraq eqqumiitsuliortunik kulturilerisunik anersaarsiortunillu angallassinnaasoq, umiarsuaraq atuartitsivittut, pikkorissarfittullu aamma atorneqarsinnaasoq. Tamatuma tungaatigut naalakkersuisut qanoq pilersaaruteqarnersoq tusarunnarsinnaagaluarpoq.

Taamatut oqaaseqarluta matumuuna Inuit Ataqatigiinniit inatsisissatut siunnersuut ataatsimiisitaliamut suliareqqitassanngorlugu ingerlateqqipparput.

Qujanaq

Peter Olsen